



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma : Tir Yimyim

tir_yimyim

tir yimyim

TAPAK 8



PM Modi-i ketdangsua NEET paper leak asuba repringshir: Centre

Lionel Messi-I FIFA World Cup trok buba nung asayatsü



VOL. XXIII ISSUE NO. 226 (ADOK 226) DIMAPUR KÜPTOKNÜ (SATURDAY) MONUPII (MAY) 30, 2026 ₹ 5.00

Manipur nung truck driver ka khaset

Guwahati, May 29, 2026 (Agencies): May 29 nü Manipur kübok Ukhrul district-i aoba convoy ka National Highway-202 nung telungpurtemi amakdang truck driver ka khaset aser police constable ka yirua lir.

BSF, CRPF, aser Manipur Police joint team kati Ukhrul leni aoba essential commodities abenba truck gari 15 nungi 20 shi ka meiner aodang TM Kasom anasa amak ta police-i ashi.

Iba mapang sepaitemi meyiper injang khaloktsü aser temeket nung tensa mejungi lir. Iba tatalokba sülen Imphal-Ukhrul road nunga ano injang khatokba osang lir ta police-i ashi.

Tanü Shangkai village nung lungkak aiteremi lenmang nung tyre rondoka supply truck garitem noktangtsü meranga liasü aser iba sülen ghonda ishika lir National Highway-202 nung convoy amak.

Iba convoy süidaktsütsü atema sepaitemi tear gas aser smoke shells amshia lungkak aiterem senshidaktsü. Iba tatalokba nung nisung pungu shi yiruba osang angazüker.

Iba sülen Shangkai village nungi kilometre trok shi dang pilar convoy amak aser iba ajanga Ukhrul-i aoba lenmang nung security risks aliba aser.

CM Khemchand-i Ukhrul convoy amakba aitsür

May 29 nü Manipur kübok

Ukhrul district-i aoba convoy ka National Highway-202 nung amakdang truck driver ka khasetba aser police constable ka yirutsüba aitsür ta Manipur Chief Minister Yumnam Khemchand Singh-i metetdaksüogo.

Iba lendong nung asüba nisung ya West Bengal nung liasü aser pa tepsetba atema mangyimer ta Chief Minister Khemchand-i ashi.

Iba ya essential supplies belenba noktangtsü meranga lapi mapa ka aser tensa tamajungba kümdaktsütsü ta pai ashi.

Manipur ajungalen supply chains tiptema ayutsü atema khu belenertemi shilem agir aser parnok amakba ya nübertem petsaprongdaksütsü aser lendongi yidaktsütsü nükjidong nung inyaker ta CM Khemchand-isa metetdaksü.

Sorkari Manipur nung yimjung bener tanaben arutsü aser tensa süngjmdaktsütsü inyakba anemba telok kari iba ya inyak asütsü akok ta paisa shisem.

Chief Minister Khemchand-isa iba lendong nung yirua aliba police constable tekaraba nung taneptsü angutsü moatsüogo.

Leingangching aser TM Kasom tsüingda telungpurtemi Food Corporation of India (FCI) jang abenba truck garitem amak ta police-isa ashi.

Zeliangrong nungeri Naga nunger 6 chioktsü akhanger

Dimapur, May 29, 2026 (Agencies): May 13, 2026 nü Manipur nung Naga nunger trok apuba chiokang ta Zeliangrong nunger lokti tentetemi takhangba agütsüogo.

Iba sentong ya Zeme, Liangmai, aser Rongmei Naga kintem asoshi tongti telok Zeliangrong Baudi Nagaland (ZBN) ajanga "Bring Them Home" omen kübok ayongzüka agiogo.

Hokolbarnü ZBN-i iba sentong ya Jalukie Town Square nung ayongzüker aser nisungtemi kanga longsoa shilem agiogo.

Lungkak aiteremi "Silence can't hide the truth" aser "Government must act now" tezülubatam amer shilem agi. Osang angazükba agi tang pua aliba Naga nunger trok ya Liangmai nunger lir.

Zeliangrong teloktemi Peren Deputy Commissioner ajanga Nagaland Governor Nand Kishore Yadav nem tezüluba ka nung takhangbatem agütsü aser iba nung nisung 6 chioktsü atema yaritsü dena lir.

Par trok ya Manipur nung Kangpokpi district kübok Leilon

Vaiphei village nungi Kuki telungpurtemi pur ao ta tai tonglokja lir.

Iba memorandum nung ZBN den külemi Nagaland Zeliang People Organisation (NZPO), Zeliangrong Baudi (Assam, Nagaland and Manipur), Zeme Council Nagaland, Liangmai Council Nagaland, Rongmei Council Nagaland, Zeliangrong Mipui Organisation Nagaland, Zeliang Women Organisation Nagaland, Zeliangrong Students' Union Nagaland, Zeliang Students' Union Nagaland aser Zeliang Youth Organisation Nagaland teloktemi sign süa lir.

Parnokisa Leilon Vaiphei village chief Lalboi Vaiphei aputsü aser asüingdangya asütsü takhangba agütsüogo.

Naga nunger 6 densema civilian 18 apuba dak sendakba nung shilem agia alir Lalboi Vaiphei aser tangartem dang asüingdangya asütsüla ta Zeliangrong teloktemi ashir.

Parnokisa telungpur teloktem den Suspension of Operations agreement agientsü takhangba agütsüogo.

CM Dr. Rio-i anir monsoon preparedness senden amen

Dimapur, May 29, 2026 (TYO): May 29, 2026 nü Chief Minister's Residential Complex (CMRC), Kohima nung monsoon preparedness senden ka ayonga menogo.

Iba senden ya Chief Minister Dr Neiphiu Rio menden ser amen aser tzungluruwa mongpu atema state renema aliba meyipa repringshio.

Senden nung Nagaland State Disaster Management Authority (NSDMA) ajanga osang lemsatep. Parnoki tzunglu arutsüba aser state tesem balala nung lendong ataloktsü akok ta asüba ajiteta aliba osangtem metetdaksü.

Senden nungsa PWD (R&B) aser NHIDCL dena department balalai lenmang aser anentsüh asoshi renema aliba osang lemsatep.

Home Guards, Civil Defence

aser SDRF ajanga emergency operation plans, resource deployment, aser response mechanisms osang metetdaksü.

Maneni, Health & Family Welfare Department-ia healthcare atema renema aliba osang lemsatep. Department-i medical personnel renema aliba, nungdakba mozütem yua aliba aser emergency tensa atema inyaktsü sentong renembatem metetdaksü.

Külen, Food & Civil Supplies Department aser Agri. and Allied department-i tzungluruwa mapang essential commodities peria rizünga aliba aser timtem melii supply agütsütsü osang metetdaksü.

NH-29 (Dimapur-Kohima) aser NH-02 (Kohima-Mao) nung tzungluruwa mapang anentsüh timtem ajurur aser lenmang shibangtsüsa akümer anungji iba

mongpu nung gari tulutem talisa 10-wheel gari tulutem senzüba azüoktsü jembitep.

Chief Minister, Dr. Neiphiu Rio-i tzungluruwa mapang tayongzükatem ajurudang department balala tsüingda amalitepa aser yaritepa aotsü nenshia metetdaksü.

Paisa mapang shitak nung mapa inyaktsü aser nisung takütem aser tongtipang infrastructure kümzüka ayutsü atema arok tebilemstü khuret abentsü metetdaksü.

Iba senden nung Deputy Chief Minister, T. R. Zeliang, Road & Bridges Minister G. Kaito Aye, Urban Development & Municipal Affairs Advisor Zhaleo Rio aser New & Renewable Energy and NSDMA Advisor Z. Nyusietho Nyuthe nungeria tebilemstü benoka lemsatep.

NSF-i Naga telongjem aser maitsü akangshitsü bangjemtep

Dimapur, May 29, 2026 (TYO): Assam kübok Karbi Anglong district nung Naga Students' Federation (NSF) 2 buba Federal Assembly alidang Naga nunger telongjem aser külem maitsü akangshitsü bangjemtepogo.

Iba senden ya Rengma Students' Union (RSU) ajanga Jongpha village (Western Rengma) nung acha-ayanga menogo.

NSF Federal Assembly ajanga Naga nunger loktiliba nung shilem ajak dang mangatettep nung malitsü saka külemi tashitaitba akümtsü, amaliteptsü

aser kati ka angatetteptsü ayongzüko.

Naga nunger tsüingda tangari arrtsü ladangja liaka aser tesem balala lemsaja liaka tanü Naga nunger "One voice, one Naga" tangatetba kübok longjema alitsü kanga nungdaker ta NSF-isa metetdaksü.

NSF senden nung onük balala benoka lemsatepba sülen Naga telongjem wazüka ayutsü aser Naga nunger ola ka aser tangatetba ka nung külem alizüng aser taginübatem tonga inyaktsü atema bangjemtepa liasü.

Tawa "southern Nagalim" nung mepetmesü ajanga Naga nunger timtem ajurua aliba nung yariteptsü atema NSF-isa bangjemtepogo.

"Kuki telungpurtem aser parnok den yaritepertemi Naga civilians amakba khukhua aitsür. Naga nunger ka amakbaji Naga nunger ajak amakba den saku" ta NSF-isa metetdaksüogo.

Parnokisa Naga senso ajak dang Naga nunger kümzüka ayutsü, yimjung aser telongjem nung alitsü atema sarasademstütsü mepishia metetdaksüogo.

CNTC ketdangpur tasentem mezüngbuba senden amen



Dimapur, May 29, 2026 (TYO): May 29, 2026 nü Central Nagaland Tribes Council (CNTC) tir Hukiye Yephthomi-i anir ketdangpur tasentem mezüngbuba Executive Council senden ka menogo.

Iba senden ya Hotel Cedar nung ayonga amen aser CNTC sanen luden aser mendenpurtem den Ao Senden, Lotha Hoho, Sümi Hoho, Central Nagaland

Women Association, aser Central Nagaland Students' Association nungi teshimtet nübotem aden.

Kin aseme Nagaland nung alirtem longjema alitsü atema külemi inyaktsü, lisopur Naga nunger temetentem atema noktaksü aser Naga temetentem, terenlok, aser kin ajak longjemtsü asoshi inyaktsü ta senden nung bangjemtepogo.

CNTC-isa Nagaland nung Kin

Hohotemi Nagaland Tribal Hohos Coordination Committee (NTHCC) tentetba atema tenüngsang agütsü.

Nagaland nung recognized tribes 15 tashi NTHCC nung dena lir aser iba luden ajanga lisopur Naga nunger tsüingda telongjem, amalitep aser ajungtsü asoshi inyakba tali akangshitsü imlar ta CNTC-i metetdaksüogo.

Nagaland Food & Feed LINK 2.0 workshop ayongzük



Dimapur, Monupii/May 29 (TYO): Nagaland Food & Feed LINK 2.0 indang State-level workshop ka May 29, 2026 nü Capital Convention Centre, Kohima nung Investment & Development Authority ajanga ayongzük liasü.

Nagaland Food & Feed LINK 2.0 ya 2025 state-level workshop mapang tamendak dak yangluba nung yangerba lir, koba sensaksemba aser value-chain mapping nungi field-level implementation, enterprise tashi itshiba aser scale-up tashi inyaka aruogo.

Küm ishika chiyongtsü yangluba, feed production, fiber-based livelihood, aquaculture, coffee processing aser credit linkage nung clean energy amshiba ajanga productivity tajungba kumdaktsüba, external inputs nung metaloka aliba ajemba aser Nagaland nung rural entrepreneurs ase producer groups atema senotsü lenmang lapoktsüba nguogo.

N2FL 2.0 yagi sorkar indang department balala, development partners, financiers, technology agütsür, entrepreneurs aser community institutions külemi

terenlok asadantettsü, metokmeperi jangjatsü aser tarutsü mera yanglutettsü.

Iba workshop nung sentong akhumdong MLA, Dr. Tseilhoutuo Rhutso-i IDAN, CESF, CLEAN, UNDP aser partner institutions temi iba ama sentong ayongzükba asoshi tenüngsang agüja liasü.

Iba workshop yagi Nagaland tarutsü mandang sayur, kong asen yimtsüngtem productivity tiyong akumtsü, lanurtem mapa agütsür akumtsü, aluyimer tem entrepreneurs akumtsü, aser terenlok mapatem grassroots tonga aotsü sayur, ta pai ashi.

Nagaland nung natural resources peria lir, mapa meranga inyaker, indigenous knowledge systems aser entrepreneur akumtsü sempet lir, ta pai ashi.

Ajisüaka küm aika technologies, finance, market aser ki o jen nungi asen rural economies pilar ali. Asen jakdang tebilemstü ya sempet maliba indang masü, saka sempet saltsü asoshi systems adokdaksütsü tebilemstü ya lir, aser item atema N2FL amala inyakyim ya tongtipang lir, ta Dr. Rhutso-i ashi.

Iba sentong ya ajanga terenlok ya policy indang jembiba alema oa field level atongtsüla ta sayur, ta pai ashi.

Food processing süang, local feed production, coffee value addition, aquaculture, stitching hub mesüra renewable energy-based enterprises tema süang, item yagi chichiba nüburtem asoshi temelenshi bener arutsür, ta pai ashi.

Chief Minister lenisüba kübok sorkari enterprise development atema ecosystem yanglutsütsü, investment promotion, lanur nem tashi agütsütsü aser livelihood generation adokdaksütsü temlungtetba nung inyaker, ta ashi.

Ajisüaka sorkar kisüngi item temelenshi bener marutsütettsü, anungji asenoki partnerships, sorkar indang department balala tsüngta telungjem, development agencies, financial institutions, technology providers, community organizations, aser private sector nüngdaker, ta MLA Rhutso-i ashi. Tanü terenlok asoshi loktepa, inyakyim tasen aser aroki khuret abenba nüngdaker.

Nagaland nung entrepreneurs aser aluyimer aika dak shisatsü, temlungtetba aser sempet lir, saka senotsü aser market opportunities mali, anungji credit linkage aser enterprise financing ya tongtipang lir, ta pai ashi.

Paisa lanurtem aser tetsürtem kasa tongtipang lir aser tetsür temi anir enterprises, self-help groups aser community institutions ajanga teyari shidak agütsüra arok terenlok alitsü sayur, ta ashi.

Kohima nung Legal Metrology tashi itshitsü training agi

Dimapur, Monupii/May 29 (TYO): Directorate of Legal Metrology & Consumer Protection (LM & CP), Government of Nagaland ajanga Ministry of Consumer Affairs, Food and Public

Distribution, Department of Legal Metrology, Government of India den lungjemer Nagaland Legal Metrology Officers ajunga atema training sentong ka May 29, 2026 nü Hotel Japfu, Kohima nung ayongzük liasü.

Sentong akhumdong Wonchio Odyuo, NCS, Secretary to the Government of Nagaland,

Department of Legal Metrology & Consumer Protection (LM & CP) ajanga legal metrology nung akhi yimya nungi modern digital technologies dangi melentsü nüngdakba indang jembiba liasü.

Nübu agi anünga aser technologies kanga kera melenshia aiba sülen anidaktsü asoshi timtem jenti ajuruaka department-i kangasa tongtipang shilem agir, ta pai

ashi.

Odyuo-i omen "Strengthening of Legal Metrology with New Technical Developments" nung ajemdaker jembidang, alima kanga keraa digitalization tsütsüi aor aser department temia technology melenshiba nung anidaktsüla, ta ashi.

Smart monitoring devices, digital weighing scales aser billing systems densema system aika digitized kumtar, anungji inyakyim temelaba, teindangba akumer. Digital system ajanga nisungeri aibelenba ajemtsür aser district aser headquarters levels nung monitoring aser verification inyakyim tajungba kumdaktsür, ta ashi.

Artificial Intelligence (AI) aser e-commerce ajanga shishilempaba melenshia tekeraba aser tajungba kumtsüogo. Anungji digital trade nung legal metrology tali tongtipangba akumer,

kechiaser online transactions mapang consumers temi oset shidak angutsü tim lir, ta

Secretary Odyuo-i ashi.

Iba sentong nung shisalen sayur ama Dr. Rakesh Joshi, Deputy Director, Legal Metrology and Head of RRSI Guwahati, Government of India aden aser pai technical developments tasen aser legal metrology inyakyim tashi itshiba indang technical session agia liasü.

Technical session nung onir Ngangshimakok, Assistant Controller, LM & CP Dimapur liasü aser iba mapang enforcement mechanisms tajungba kumdaktsütsü, technical efficiency aser consumer protection indang jembiba liasü.

Sentong tembanga Chullen Chang, Assistant Controller, LM & CP Tuensang ajanga jembiba aser Shiloh Kath, Deputy Controller, LM & CP ajanga melepzüng o jembiba liasü.

Iba sentong nung Shiekhoso, Assistant Controller HQ, LM & CP menden liasü aser Additional Controller & HoD, LM & CP Nagaland, Limatoshi Jamir-i pela agizükba o jembiba.

Dimapur Ao Lanur Telungjem-i khukhua aitsür

Dimapur, Monupii/May 29 (TYO): Dimapur nung tetsür chanu ka dak tim masü ta tai tonglokja aliba osang atema Dimapur Ao Lanur Telungjem (DALT)-i tebilemstü akaba lemsatepogo.

Iba timtem ajurua alila aser lar kibong den onok nokdaka lir. Iba ama tim masüba mapa ajanga temang, tekolokshisatsü aser libaliru kong kanga mejungi kongshir alitsü aser timtem ajurur alila nem nüngdakba teyari agütsütsüla, ta DALT-i sangdong nung ashi.

Iba ken o tang ozüng agi alenbanga bushisüngdangba mapang lir asünung ketdangsurtem dang indangindanga aser ochishia ken o bushisüngdangtsü aser timtem

ajurua alir nem temeden shidak agütsütsü ajungshir, ta ashi.

Ken o tamajung aser tanur ka dena lir asünungji, iba ken o nung temulung agütsütsü tongtipang aser ozüng agi melaba ama shidak inyaktsüla, ta DALT-i ashi.

Tetsür aser tanur kumzükä ayutsü ya arok teinyaktsü asütsüla, tanur kumzükä ayutsü, meimchir temeden soita ayutsü aser nisung ajak tetsübo makai litettsüsa tensa bener arutsü asoshi tangatetba nung nokdaka lir.

Onoki ozüng amshirtem dak tamang akar aser iba ken o nung temulung agüja ochi obendang yakta agütsütsü imlar, ta DALT sangdong ajangasa ashi.

School Education Department-i Mhathung Tungoe den tepila sentong agi



Dimapur, Monupii/May 29 (TYO): Secretary, School Education Department, Mhathung Tungoe nem akhum agüja tepila sentong ka May 29, 2026 nü Secretariat Conference Hall, Nagaland Civil Secretariat, Kohima nung agia liasü.

Advisor, School Education and SCERT, Dr. Kekhrielhoulie Yhome-i iba sentong nung jembidang, mapa nungi anisüngzük angusang ketdangsur ya teintet, tajangshiba balala aliba aser bendanga agütsüba ketdangsur, shibai tongtipang mapang department asoshi shilem tulu agia liasü, ta ashi.

Tungoe ya department nung mapang tatsüka dang inyakaka, pai tongtipang policy, institution balala temelenshi aser administrative mapa kanga junga ketdangstüogo, ta Dr. Yhome-i ashi.

Pa mapang department nung tongtipang terenlok maparen aika inyakogo, ta ashi.

Pai ano School Education Department ajanga timtem balala ajangshiba indang lemsatep aser Tungoe ama ketdangsur temi mulungsoa tenzükba asoshi pelaba lemsatepa liasü.

Mapa nungi anisüngzükba ya nübur tenzükba tatem ka ama mebilemstüla, saka ano takum nung noklem tasen ka tenzükä ama züngshia lokti aser nübur asoshi maneni inyaktsüla, ta Dr. Yhome-i ashi.

Shashank Pratap Singh, Principal Director, School Education ajanga iba sentong nung jembidang, Tungoe mapa nungi anisüngzük anguba ya Nagaland sorkar küm 33

jungnüa bendanga agütsür tenzükba temaitsü ka lir, ta ashi.

Pa office nung tatem tashi bendanga agütsür inyakba asoshi Singh-i pelaba lemsatepa liasü.

Secretary, School Education, Mhathung Tungoe-i tepila o jembidang, pa mapang department ketdangsur aser staff temi yaritepba, amalitep akaba aser medemer ama inyaka aruba asoshi pelaba lemsatepa liasü.

Tungoe-i Tsüngrem dang pa len aniba asoshi pelaba lemsatep aser pa kinungtsü aser tanur temi teti yaria liasü ta ashi. School Education Department nung inyakdang ajangshiba bilemteta jembidang, tayongzükba aser shisatsü anguba mapang aika liasü, ta ashi.

Department-i aruba mapang maparen aser inyakyim tasen liasü, saka ketdangsur aser staff temi yaritepba yong mapa takok ngua inyakogo, ta pai ashi.

School Education Department nung tajungtiba yimiyaji ketdangsur aser staff tem telungjem aser teamwork ya lir, ta ashi.

State tesem balala nung tesayur aser staff temi shilem tajung agiba indanga pai tenüngsang agütsü aser department ya kibong tuluka ama lir ta ashi aser ketdangsur aser staff tem dang maneni bendanga agütsür angatettepa telungjem nung inyaktsü ayongzük liasü.

Sentong tembanga Vikhwen Chale, Additional Secretary, School Education & SCERT ajanga melepzüng o jembiba liasü.



May 29, 2026 nü New Delhi nung 'Operation Sindoor' indang kaket ka sayaba sentong nung Union Defence Minister Rajnath Singh, Chief of Defence Staff General Anil Chauhan, Chief of the Air Staff, Air Chief Marshal AP Singh, Chief of the Naval Staff Admiral Dinesh K Tripathi aser tangartem angur.

Amit Shah-i India-Pakistan arrtsü nung G-7 border outpost semzüksü



New Delhi, May 29 (Agencies): Hokolbarnü Union Home Minister-isa, Union Home Minister Amit Shah-i India-Pakistan International arrtsülen Gujarat kübok Bhuj nung Border Outpost G-7 semzüksüogo.

Shah-i, Harami Nala region nung security grid tajungba akümtsü atema technical tayongzükbatem kottetogo, ta metetdaksü.

Shah-isa Border Security Force (BSF) sepaitem den sensaksem aser neem süngdong ka tema yutsü. Border Outpost semzüksüba sentong nungji Gujarat Chief Minister Bhupendra Patel aser Deputy Chief Minister Harsh Sanghvi nata liasü.

"Yang nungi kilometer ishika pilar Banaskantha nung centre ka semzükogo aser ibaji nenoki inyakba mapatem nürurtem nem metetdaksütsü atema lir. Iba centre ya sen crore 175 indoka yangluogo. Tanü G-7 aser G-13 projects semzüksüogo. Ni Home Minister tenangzükba agiba sülen mezüing BSF den senden amenba mapang nung Harami Nala region nung security jenjang mejungi aliba meteta

liasü," ta pai metetdaksü. Union Home Minister-isa, "Onoki iba region tesem ajaklen security grid tashi itta yangluogo. Iba ama tesem ka nung tower amenoktsü densema tayongzükba jenti aliba ni meteta liasü. Iba region tesem ajaklen Border Outposts ali nungi metre 3.75 tali ajungketogo. Tesüiba ita asem tashi ni anogo shia iba project reprangshia liasü," ta metetdaksü.

West Bengal nung arrtsülen security dak sendakba nung Amit Shah-i, arrtsülen atsü matsüi alibaji tebilemtsü onük tuluka liasü saka BJP-i Bengal assembly election nung takok ngua sorkar akümba sülen atsü atsütsü atema Chief Minister Suwendu Adhikari-i BSF sepaitem nem ali agütsüogo, ta metetdaksü.

Paisa, arrtsülen atsü atsüba maparen tembangba sülenbo ozüing alema arrtsü adena aitba anentsü, ta metetdaksü.

Shah-i anogo ananü Gujarat semdang. Brihostibarnüa pai 'Bharat Mata Sculpture' semzükja liasü. Iba sentong nungji Chief Minister Bhupendra Patel-a liasü.

PM Modi-i ketdangsüa NEET paper leak asüba reprangshir: Centre

New Delhi, Monupii/May 29 (Agencies): Hokolbarnü Centre sorkari Supreme Court dang, Ato kilonser Narendra Modi-i NEET-UG paper leak ken o reprangshidar ta metetdaksü, ajisüaka ibaji ajanga court melung masü, ta osang ka ajanga metetdaksü. Supreme Court-i Centre sorkar dang, komaser paper leak asütsüsa aküm, ta asüngdangba den külemi NEET tatidang ketdangsüa agiba National Testing Agency (NTA) tashimaitba dak sendakba nung tasüngdangba aika kaogo.

Centre sorkar tenüing nung jembir Solicitor General Tushar Mehta-i Justice PS Narasimha aser justice Alok Aradhe nati akümba bench

dang, iba ken o ya Ato kilonseri junga repranga asadangdar, ta metetdaksü.

Court-i sorkar dang, "Nenok mapang shia senden mener asü? Jungjunga mita reprangaka kechiba tamakok aludaksü?" ta asüngdang.

National Testing Agency aser High Powered Committee nung chairman, Dr K Radhakrishnan-i court dang, committee-i tebilemba onük 60 benoka liasü, aser item onük teimbaka mapa kuma benokogo aser inyakyim karbo tang tashi anendaka lir, ta metetdaksü.

"Justice Narasimha-i, "Süra tebilemba onüktem benokba nungji langka tai lir, mesüra mita reprangba nung tamakok liasü. Iba ya komaser atalok?"

ta asüngdang. SC-isa, "Khenpiga atema masü saka teti atema inyakyim junga yanglushitsü nüngdak. Nija masü saka reju nung temelenshi alitsüla. Nisungtem melenshitsü saka inyakyimjibo kasa shidak dang alitsüla," ta metetdaksü.

SC bench-isa, India-i UPSC ya world-class institution ka ama yangertetogo, yamaji NTA-ia kasaji inyaksüala, ta metetdaksü. Court-i Ministry of Education dang hopta trok tsüngda temeja affidavit ka nung tarutsü nung NTA-i NEET tatidangtem koma ketdangsüa agitsüar inyakyim tejangja metetdakja, ta tuyu.

Iba ken o ya maneni July ita tanabuba hopta nung angadangsü.

Siddaramaiah-i Sonia, Mallikarjun Kharge aser Rahul Gandhi nunger ajuru



May 29, 2026 nü New Delhi nung Congress Tir aser Rajya Sabha nung opposition lenir, Mallikarjun Kharge-i party lenir Siddaramaiah ajurudang tangokba noksa nung angur. Siddaramaiah-i Karnataka Chief Minister menden toktsüogo.

New Delhi, May 29 (Agencies): Siddaramaiah-i Karnataka nung Chief Minister menden toktsüba sülen anogo ka lir Delhi nung Congress lenir Sonia Gandhi aser Rahul Gandhi na ajuru. Pai Congress Tir, Mallikarjun Kharge-a ajuru.

Pa den par jabaso Yathindra aser party lenir Randeep Surjewala nata liasü. Congress nung bangdak lenirtemi Siddaramaiah dang Rajya Sabha menden ka agiang ta asüngdanga liasü, ajisüaka pai magizük.

Siddaramaiah-isa pai maneni Karnataka nung dang liner aser

Central nung shilem maginer, ta shiogo. Osang angazükba agi, Siddaramaiah-i par jabaso nem deputy chief minister aser pa pusemer kar nem cabinet menden agüjang ta mepishitsü.

Congress nung bangdak lenirtem tetuyuba nung Siddaramaiah-i chief minister menden nungi anenba shidiji Karnataka Angh Thaawarchand Gehlot-i agizükogo.

Congress general secretary in charge of organization K C Venugopal aser Chief Minister akümtsü alisang, Deputy Chief Minister D K Shivakumar na leniba nung sorkar akümtsü atema senden

aika ayongzükba amentsü.

Ano tanga osang ka nung, May 30 nikongdang Karnataka Congress Legislature Party (CLP) senden ayongzükogo aser iba senden nungji legislature party lenir shimtsü.

Iba senden nungji KPCC Tir DK Shivakumar, AICC general secretary aser Karnataka in-charge Randeep Singh Surjewala aser Legislative Council House lenir NS Boseraju, Congress MLA tem, MLCs, MPs aser working presidents ajak adentsü.

CLP senden nungji legislature party lenir tasen ka shimba sülen sorkar tasen akümtsü atema inyakyim tenzüksü.

Kolar district nungi Congress lenir teneti shidi ka ajanga Congress Tir Mallikarjun Kharge dang cabinet tasenba nung district nem minister menden asem lemzükjang ta mepishiogo.

Lenirtem jagi Scheduled Caste (Right) category kübok Bangarpet MLA, SN Narayanaswamy cabinet nung shimang aser General category nungi Malur MLA KY Nanje Gowda aser Kolar MLA Kothur G Manjunath nata cabinet nung züngokang ta mepishi.

Form No. 3
[See Regulation-13 (1)(a)]

DEBTS RECOVERY TRIBUNAL GUWAHATI
Suwarna Bhawan, House No. 12, New Town Path,
Near Hanuman Mandir, G.S. Road, Ulubari, Guwahati- 781007 (Assam)

Case No.: OA / 135 / 2026
Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993.
Exh. No. 6163

BANK OF BARODA
- VS -
M/S. ACHUMI TRADERS & FEEDS & Anr.

To,
(1) M/S. ACHUMI TRADERS & FEEDS
A Proprietorship Firm, Represented by its Proprietor i.e. Mr. Inato Sumi, having its Office at: House No. 1, Ward No. 23, Y. Zhimo Colony, Signal Basti, Dimapur Sadar, Dimapur, Nagaland- 797112.

(2) MR. INATO SUMI
Son of Hukato Sumi, Proprietor of M/s. Achumi Traders & Feeds, Resident of H. No. 1, Ward No. 23, Y. Zhimo Colony, Signal Basti, Dimapur Sadar, Dimapur, Nagaland- 797112.

JAOKER

12.05.2026 anogo nung Presiding Officer/Registrar matsüngdang **OA / 135 / 2026** benoka liasü.
Sentsüh **Rs. 71,58,064.68** alangzüksü atema na anema benoka aliba (OA) nung iba Act nung section 19(4) kübok shia aliba application nung ajemdaker jaoker/notice agütsü (application den documents etc densema lir).
Iba Act nung section 19 kübok sub-section (4) nung ajemdaker na aser defendants dang tekübok shia alibatem tuyur :-
(i) tajaba agütsüba sülen anogo semer nü tsüngda relief asoshi mepishibaji kechiba magütsütsüla, iba kulji sayutsü metetdaksü;
(ii) Original application nung serial number 3A kübok applicant-i shia aliba kiojen aser assets dak alia tanga kiojen aser assets sangdongtsüla;
(iii) Original application nung serial number 3A kübok shia aliba kiojen aser assets ayoktsü mesüra item kiojen atema inyaksangshitsü memelar;
(iv) Security interest atema inyaksangshiba dak alaka Tribunal dang nungi jelia temelaba magii original application nung serial number 3A nung shia aliba kiojen mesüra tanga assets ayoktsü, lease asütsü mesüra tanga kecha inyaksangshi masütsüla;
(v) Ordinary business ajanga secured assets mesüra tanga assets aser kiojen nungi yokzükba senji security interest soita aliba bank mesüra financial institutions indang account nung deposit asütsüla.
Iba dak alia nü dang applicant nem tezüluba nung sangdong ka agütsütsü aser **30.06.2026** anogo nung anepdang **10:30** ako tashi nung Registrar matsüngdangi arutsü tuyur, mesüra na maliaka ken o angadanga sülen telemetba agütsü.
Paper Book atema agüja aliba Url nung ya reprangang: https://cis.drt.gov.in/drtlive/paperbook.php?ri=2026373450325
13.05.2026 anogo nung kü meyongnem aser iba Tribunal seal agütsü:

Registrar,
Debts Recovery Tribunal, Guwahati



TIR YIMYIM YIMOBILEM (EDITORIAL)

DIMAPUR

KÜPTOKNÜ

MONUPII 30, 2026

"Trans' tetezü ya kechi ?

Tanü putu nung nisungtem rongnung atsü-aponng indang jembir asünungbo tetsür agi tebur aser tebur agu tetsür akümba indang jembir asütsü, saka nisung aser gari jajatsüba lenmang indang jembir asünungbo 'tesem ka ajanga süiba' indang jembir asütsü. Anungji, Trans ta amshia gari lenmang ka yangluba agi lenmang tuluka asütsü ta masü. Ajisüaka, tanü asenok Nagaland nung alir nübertem, talisa asenok Aortem nem yimten nung lenirtemi mashilen angatetdaksüba 'Trans' tetezü tajung tuluka ta asüba tetezü amai angatetdakja ali amai angateter. Ibayongji, tang Foothill road inyakpeta yur, Trans Nagaland Highway yanglutsü asoshi sentong tasen ka renemer Union government dang sen meshidi ta ashiba o jagi Nagaland nung alir Naga kin lenirtem mulung akok amai angashir. Ajisüaka, kodang asenoki 'Trans' tetezü angatetdir, tang inyakpeter aliba Foothill Road yaa 'Trans Nagaland Highway' lir, kechiyong iba lenmang yagi Nagaland tesem tuluka ajanga aoer aser State Highway mesüra National Highway sütettsüsa lenmang tasazükja 'two lane' lir, anungji tang teinyakdak Foothill Road den tang government-i jembiba Trans Nagaland Highway naji ka tenüng Foothill aser ka Trans Highway dang ashi, lenmangbo kasadang asütsü. Aji oda, Tawang nungi Kanubari ajanga aoba Trans Arunachal Highway yanglua alibaji asenoki repringdangra, aji 'Trans' ta lir saka lenmangbo asenoki tang yanglu tenzükba Foothill tetka '2 lane' dang lir. Aji oda, teratatsü kaji ,tang government-i foothill road ya tema meinyak ser Trans Nagaland Highway indang jembia sayubaji, ashiko foothill road yanglutsü atema sen crore 430 nungi sen crore 130 shi agi inyaker, ano sen crore 300 anünga alibaji miimbanga yur tanga nung amshiner asü mesüra amshiadoker mimbangner ta bilemer. Ibaji kodang jungjunga bilemdangdir, foothill road atema sen crore 300 shi anünga aliba jagi foothill road ya tatemtsüka tashi tembanga inyaker külen iba foothill road ya 'Trans Nagaland National Highway tenüng agi melen nungang shitak süla ta bilemer. Tang yabo foothill road-a merenem aser foothill lenmang yangluyonga aotsüba sen crore 300 bo department-ia kong aliar memetet aküm aser külen aji mimbanga 'Trans' ta asüba ojang agi Naga nungertem mulungjangbo koka adok ta Naga nunger jungjunga akoksatsüsaba tia kati iadokogo. Ajisüaka, iba tensa tia nungi Naga nunger kümzüktsüba memenu aser tamakoksüa masü, anungji Naga nungertem Nagaland ajangba lenmang, Trans Nagaland Highway, ji tang yanglutor aliba Foothill road ya lir ta angateta iba mapa ya tama atemtsüla, kechiyong Trans Nagaland ...tetezü Nagaland ajanga süiba. Trans tetezü lenmang tajungba aser tuluba ta ashir masü ta asenoki angatetdi. Ano, foothill road dak aketba tanabuba tebilemsü kaji, ali kiburtem nem alimenok magütsünüba tebilemba ya asütsü. Lenmang kangasa nungdakba agi, lenmang dang yanglutetra ta ser, tang Foothill Road Coordination Committee purtemi anir ali kiburtem dang mepishia mezüng lenmang tupoka aotsüba atemajibo alimenok memeshidaksüi tenla agütsüdaksüogo aser kecha telok nema sarusachi mesüdaksüi sademsadema inyadaksüogo. Ajisüaka, gari lenmanng tulu two lane ama tupoka aodangbo ali kimong tululu tutoktsüsa akümer, anungji sensakertembo anarongdena pei tsürabur senmang alu tilaka mesüra kimong tilaka aliba ajakji tagi majung tudoktsüsa akümer, aser highway asüyonga yimti ajangba tesem dang ashi, arem nungbo lenmang agi ajangba tesem asüyonga jenjang maka akümer. Anungji, yimkong atema highway lenmang atudang ali kiburtem nem alimenok magütsütsü bilemba yabo takartem atsünga sensakertem tia mereprangtet inyakba sentong ka asütsü. Iba jagi Nagaland nung highway yangluba ajak nung, asenok dak alaka, alimenok agiba osang asenoki angashir. Aji oda, Naga nunger ali kiburtemi highway yanglutsü atema pei li ajanga süia atuba jenjang alimenok meshibaji, kari danga India temzüng Arla 371 A mashilen angateter amshir amai bilemra, ano khen bilemdangtsüla. Tang ama highway yangluba mapang aser mapa nung Naga nunger ali kiburtem yaritsü asoshi linük temzüng arla 371 A ya latettsüba lir, saka asenoki asen li nung alimenok memeshili süra asenok tokolok tali ulura asütsü.

OLEMSABANG

Aor Khristantem Apusuang

M. Meren, Ex. Pastor.

Aortem 1872 mapang tashi nungbo ano yim o yim na aser nisung ka o ka na tsüngta lepteptsüngtep tiyalong liasü. Anungji kishikinar o kishikinar na tsungta shishilemba mesütet, pei yimtsüng nung pei lushi nung aki-alu meyimtet kati ka tsübuba agi alu meyimtet sür ayawara tulu liasü. Saka iba mapang nungji Dr E.W. Clark Sibsagar nungi aposua atua tenemlenji pa kolak mangazüka lua tokongneta repranger Molung tenem jagi aposu aser lenmang nung ali tesa nung konung yipzüker tananü Molungji pungtet. Yamaji pa Naga tenem jagi atuba ajanga kishikinar tsüngta yimjung lapok aser nisung tsüngta yimjung adok, aser yim ka o ka na tsüngta shishilemba süteta tebok sünga aliba ajanga kika süchir jenti adoka takar aika aküm aser ayawara anena aküm. Tongtibangsa Ao lima nung tashir jenti adoka Naga lima nung Aor shisanga aküm nung, Aori anir Molungyimsen nung mezüngbuba Ao Mungdang tulu sentep aser kishikinartema aika arua aden aser ajaklen yimjung lapokiyonga ao.

Aji oda, America lima nungi pei kolak lepzüka bener aotsü metsübu asen Naga tenem limai Clark atuba ajanga tanü asenok kechi tia nung lir aji lir. Clark Naga tenem lima nungi maludang Sibsagar nung aliba British nunger tulurtemi Mrs. Mary Clark dang naia ne kinungbu pa temang nung tokolak keter Naga tenem nungi arutsü ta amanger no? ta ashiba angur. Tanü asen tia den par mapangji temetemdangma, kechiaser iba mapangji asadangtsü makokba putu ka liasü. Clark asen Naga tenemi matu asübo tanü asen kechi tia nung lila?

Iba sülenji joko asen Aortemi Missionary-temi nungloktsüba ama lepteptsüngtep lima koba dang asenoki Meri-Sangtam ta ajar, par limai yim o yim na tsüngta yimjung mali tetsübu agi sünger aliba tsüngta nungji yimjung adokdakja Osangtajung sangdong. Tanü par lima koba tashi tenük lapoker lir, aji asen Aor metsü, parnoki hau süang nunga ta süang saka aji asen tsüraburi noknü metsübu oda Dr. Clark nungi angazüka tamang tasü-tait agi noknü tsüngta asen Aortemi nungpoka aiba ajanga tanü par tia asen dang nungi tajungba küma odaki. Saka British Sorkaribo tzü atena Osangtajung bener maotsü ozüng tesashi agütsü saka British ozüng metsübu Osangtajungji bener ojen ao nung Missionary Rev. Kijung dangbo Mokokchung SDO-i jaketa meren aser sen jenti senchi (fine) achi, iba senji Longkhüm nunger obala Nokchirabai küpdangtsü, aji asoshi Tsüngremi par kibung koda moatsüogo. Tanü asen jakdang aliba obala nungeribo yamaji tasümaken yimjung mapa inyakba angur.


Tongtibangsa ano 1954 meta nungi Naga nunger o India nunger na tsüngta Naga nüchiso atema tesüngmangtsü rara tulu adok. Idangji India Army-temi Naga nunger kecha maka oda noknü dak alaka hatir kecha maka teka tesa alibapurtem den hatir tulu bener tashi ajak agi parnoki rara. Naga nunger ki ajak anaben asemben rongtoktsü, alu mena akaba ajak mi sena rongtoktsü, aser tsükma süng agi züka ao aser yimtsüng nung tebur-tetsür ajak atsüzüka züka züka aika sūdaksü. Tanü Kuki nunger rishikangshiba tang taoba benshi. Yimtaklir mezüngdangtet Jorhat jail nung, Dibrugar jail nung, Kohima jail nung, Mokokchung jail nung, Tuensang jail nung, Mon jail nung küm jenti shibanga ayu, aika jail nung asü. Yim pungu-trok yim ka nung atsü tapu asem agi atsübanger küm ka piyong shibanger ayu, aya agi aika asü. Iba timtim marem nung public aika arem nung alitsü kibong ajunga jena oa arem aser alu nung jenoka ali. Yamaji rishikangshi tulu den tasüba jenti ajuruaka asen Naga nungeri pei nüchiso mapa metoktsü aser tasü itta noktak aser tasü arem.

Iba tensa mapang nungji ABAM lenirtemi anir Arogo nung pastor-tem ishika shimteter Naga lima yamai tajem tia nung shibanger malitsü, saka Yisu dang tamang agi ayimtentsü aser "Naga lima Khrista asoshi" (Nagaland for Christ) ta kangki nisan tulu yanglua aji apur Naga lima ajak leni nübu lemsar Tsüngrem dang tashi tulu meshir lendong tulu mapang nung tasütsü metsübu nüburtem tetsübu tatenten tiyalong nung alidang, yamaji yimjung asoshi aposu. Ammang nung tanur tajem tia nung alidang tsürabur aru ama iba jagi Naga nungertem taten tetsübu anen.

(Maneni asüng adok nung angutsü...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Pastor kati DRC nung Ebola tashidak atema sarasademtsü mepishir



May 24, 2026 nü Congo kübok Bunia nung health workers-i kima mozü sema senzüdang tangokba noksa nung angur.

May 29, 2026: Tang Democratic Republic of Congo (DRC) nung Ebola tashidak nokdangtsü meranga inyakaka iba tashidak kanga prokba menokdangteti lia pastor kati iba tashidak nokdangtsü atema sarasademtsü ayongzükogo.

Osangbener den jembidang Rev. Bisoke Balikenga-i par yimti, Bunia nung iba tashidak ajanga nüburtem kanga timtemba metetdaksü.

"Nüburtem rongnung iba tashidak nokdangtsü atema onok asoshi sarasademjang. Onok nisung aika samaogo, anungji joko nisung asüba anentsü atema sarasademdaksüner," ta pai

mepishia metetdaksü.

Paisa, America nungertemi pa indang ministry, Hearts for the Congo nem tenla agütsütsü akok, ta metetdaksü.

Hearts for the Congo-i linük nung lajartem, refugees aser sensakertem den Yisu temeim lemsateper aser teyari balala agütsür.

Rev. Balikenga-i, "Lanurtemi health center raksatsüogo, kechiyong parnoki kinüngertem tasü mang aginer," ta metetdaksü.

Ebola tashidak prokba nokdangtsü atema inyaker Tyler B. Evans-i, iba tashidak ya azü aser metzü ajanga menateper, talisa nisung ka asüba sülen mezü ngbuba

ghonda 48 tsü ngda kanga proker, anungji tasü mang tajungtiba nung anepalutsüji kanga tongtibang, ta ashi.

Health workers-i Ebola tashidak agi asürtem tasü mangji kinüngertem nem agütsütsü memelungba agi aikati health centers amaker.

Rev. Balikenga-i, "Parnok kanga jashir, kechiyong parnoki kinüngertem asüba tasü mangji remtsüner. Africa nungbo tasü mang aremstüji kanga tongtibang aser mang aremba mapang nung asürtem nem akhüm agütsüner. Ajisüaka Ebola tashidak agi asürtemji health workers-i dang anepalua remtsür," ta metetdaksü.

Uttar Pradesh nung pastor ka densema Khristantem apu

May 29, 2026: Uttar Pradesh nung Khristantemi tangartem Khristan yimsü dangi meyipdaksüba sentong ayongzüka agir, ta tai tonglokja Khristan asem apu.

May 27, 2026 nü Jalaun district nung police-i pastor Vivek Kumar, Mohit Chaudhary aser Amit nunger apu. Parnoki tangartem Khristan yimsü dangi meyipdaksür, ta parnok nem tai tongloktsü.

K e t d a n g s e r t e m i Khristantem anema First Information Report (FIR) ka benokba sülen parnok anema bushisü ngdang tenzükogo.

Khristantem jagi yimsü meyipdaksüba sentongtem ayongzüka agi aser parnok ket nung Laishiba aser Khristan kaketterm liasü, ta FIR nungji shia lir.

Arogo nung lenirtemi ashiba agi, Khristan asemji tangar nisung 30 den külemi state yimtiba, Lucknow nung sarasadem sentong ka nung

adentsü atema aoba mapang nung right-wing Hindu zü ngsemtemi bus ji nokdangba sülen bus ji mita reprang.

Bus nung mena alirtem kar ket nung Laishiba aser sarasadem kaketer kar apu, iba sülen parnoki police aja.

Ajioda police aruba sülen parnok ajak police station-i anir ao aser nisung asem apuba sülen tanü ngbatembo ajak chioka liasü.

Pastor Joy Mathew-i, "Parnoki tangartem yimsü meyipaksüba nung shilem agir ta parnok nem tai tongloktsü baji khenyongi tiyazü," ta metetdaksü.

Pastor Mathew-isa, Uttar Pradesh nung anti conversion ozü ng tim mesüi amshiba aser Khristantem kanga amakba mapang ka nung Khristantem puogo, ta metetdaksü.

Nütsü ng million 240 aliba Uttar Pradesh nung mapang shia Khristantem anema inyaker.

Arogo nung lenir kati,

"Taküm küm kija nung, May 28 anogo tashi nung pastor tem densema Khristan 84 jail nung puokogo, aser parnok ajak anti conversion ozü ng kübok tai tonglokja apuba lir. Parnok rongnung tang tashi parnok 13 bo jail nung timtemdar," ta metetdaksü.

"Iba ya Khristan yimsü aser Arogotem tenü ng menü ktsütsü atema inyakba lir. Hindu right-wing teloktemi Khristan mission anentsüner aser India ya Hindu linük ka kümdaksüner," ta paisa metetdaksü.

Tang India nung anti conversion ozü ng benoka aliba state 13 nung Uttar Pradesh-a densema lir. Iba ozü ng kübok mesüzüka, tashiyim amshia mesüra ashikülak ajanga yimsü meyipdaksünertem nem temerenshi agütsür.

Uttar Pradesh nung Khristan nütsü ngji state nütsü ng shilem 1 den tajemba lir.

ANOGO ABEN TSÜNGREM DEN

Asen tebu mesüka repranger

"Asenok Tsü ngrem chir ta ajatsü asoshi, Tebui komama temeim asenok nem agütsü, aji ajiang, aser asenok yamaji techir küma lir. Aji asü nung alimai asenok memetet kechiyong alimai Pa memetet"

1 Yh. 3: 1.

Tetenzük nungi kibong tesendaktepi liasü. Techir asoshi maongka mapa inyakba indang 1 Peter 1: 17. Pa temeimji tangar dang nungi temaba. "Tembar asoshi pei taküm yutsüba dang nungi tuluba temeim mali" (Yn. 15:13). Pa temeimji talang, lenden, metong ajak nung tesadem lir. Asadangtsü makok.

Tanur ka dak mezü ngbuba jakla akatsü baji tsürabur takü mji asutsüla. Pa shiba techir aka taküm kar. Pa chir asenok dak lidaktsüba ajanga Pa temeim asenok dak moshia lidaktsür. Tabensa Tebu kati kodaser techir dang memeimtsü ? Yamaji asenoki Pa asen taküm nung Pa kibur sü daksüra Tsü ngremi moatsütsü.

Pa temeimi kibong nung talentep kadaktsür. Asenoki kümtetdakba ama jajara aji Khrista asenok dak lia pa jajaba lir. Tsü ngrem jakla kibong nung alir dak aliba ajanga kibongji tesü nep nung lia otet. Kibongi Pa sentsü wangshi jungkai adoktsür. Alimai Tsü ngrem memetet, anungji pa jakla asenok dak ali tashi alimai asenoka memetettsü.

Israel-i West Bank nung tashiyim amshiba aitsür: Bishop Jim Curry



Bishop Jim Curry

May 29, 2026: UK aser alima nung lenirtemi Israel-i West Bank nung tashiyim amshiba aitsüba sangdong ka Catholic Church in England & Wales-ia pusemogo.

UK aser alima nung lenirtemi külem sangdong ka ajanga, West Bank nung tensa kanga mejungi kümogo aser Israel-i iba territory azü oktsü meranger, ta metetdaksü.

Tesü iba küm ka tsü ngda Israel nungertemi Palestine nunger Khristantem anema inyakba tatalokbatem-a aika lir. Talisa Khristan nütsü ng aika aliba Taybeh jilabo aiben maakogo.

Israel-i West Bank nung ambangyima inyakba aitsüba shidi nungji France, Germany, Italy, Canada, Australia, New Zealand, Norway, Netherlands, Spain, Belgium aser EU nung lenirtemi sign süa lir.

Catholic Church in England

& Wales tenü ng Bishop Jim Curry-i iba sangdongji pusemba metetdaksü.

"Israel nungertemi ambangyima ali atsü nga agiba aser iba ama mapa nokdangtsü atema inyaktsü asoshi ayongzük baji Arogo lenirtemi pusemer, aser iba nungji kü ola-a densema lir. Khristan aser Muslim nunger temeshi tesemtem kümzüktsü atema Hashemite nem tashi agütsü baji Israel sorkari akhü mtsü butsüla aser PA den Palestine nunger rongsenkettzü ng anema tenokdangbatem benoka alibaji agientsüla," ta Jim Curry-i metetdaksü.

"Arogo nung lenir ka ama ni-a ozü ng alema maneni ali atsü nga agiba aser tashiyim amshia Palestine nunger prokshidaktsüba anema ola adokertemji pusemer," ta paisa metetdaksü.

AO OSHI ANGAZÜKDAK:
TANÜ ANGAZÜKTSÜBA OJANG



Tir Yimyim

Yimdangi

(n) temulung nung nukla dangi arua bilemba (visualize, imagination)
* Kotak ya komaka alitsü ta teti yimdangi arua bilemer.

Yimdangjem

(n) shitakba masü temulung nung bilemba (fiction)
* Yapangbai yimdangjem otsü kanga junga zülur.

OLONG PAITEP # 7519

1		2		3		4		5
						6		
	7			8				
9								
10					11	12		13
				14				
15		16						
17						18		
19			20					

TIPIEN	LANGTSÜNGLEN
1. Chi mesekdang tang amshiba	2. Langka asoshi - (6)
4. A _ _ _ lang - (3)	3. Temaitsü - (5)
7. Nü den tambu - (3)	5. Tanur masü - (4)
8. Teberem nung mesüba sü - (6)	6. Talang nung masü - (3)
10. Ajitetter - (5)	9. Mesük - (3)
11. Ken dang masü - (5)	12. Memesüktep - (6)
17. Aria bilemba shisatsü - (6)	13. Rong tapu ka - (3)
18. Aonung yimzüba shiruru - (3)	14. Mesaklok - (5)
19. Lemzük - (3)	15. Ali telong nung enok - (4)
20. Kilong nung telemsa - (7)	16. Atentsü asoshi mejemba - (3)

OLONG PAITEP # 7518 TELANGZÜBA

TIPIEN :	LANGTSÜNGLEN :
1. Telok, 4. Aluru, 6. Ozüng,	1. Tenükjang, 2. Luden, 3. Kioiktsü,
8. Emk, 9. Kin, 10. Teti, 12. Süir,	5. Lenti, 7. Tajangzük,
13. Jen, 14. Ola, 16. Talak,	11. Teronem, 12. Sempa,
17. Mazük.	13. Jahaz.

NAI-A YA METETTER MA



Canada nunger Antoine Moses-i ghonda 24 tsüngda mangrove süngdong 47,460 atemba atema Guinness World Record ka yangluogo. April 30, 2026 nü Antoine Moses-i Kenya kübok Mombasa city nung iba ya inyakteta liasü.

DoNER Minister-i 'Mission Queen Pineapple' project tenzüktsü



Agartala, May 29, 2026 (Agencies): DoNER Minister Jyotiraditya Scindia-i Tripura nung Rs 236 crore 'Mission Queen Pineapple' project tenzüktsügo.

Iba sentong ya New Delhi nung agi aser Tripura Chief Minister Manik Saha aser Tripura Agriculture and Farmers' Welfare Minister Ratan Lal Nath na aden.

Tripura nung tsünütetba jiritem ya India tenüng nung international markets nung shishilembar. Iba mapatong ajanga Tripura jiritem cultivation, storage, processing, aser export maparen akangshitsü ta DoNER Minister Scindia-i ashi.

Iba mapatong ajanga infrastructure akangshitsü aser state ajungalen jirulu ayimertem yaritsü ta pai ashi.

Northeast nungi jiru tajungtitem Dubai aser Germany nung markets atonger" ta Scindia-isa ashi.

Pa Union Civil Aviation Minister asü dang Krishi Udaan scheme ajanga teyari agüja exports nung yaritep aser iba ajanga aluyimertemi subsidised rates nung bendangleni yokteta liasü ta Scindia-isa metetdaksü.

Iba mapatong nung Tripura sorkari Rs 20 crore aser DoNER Ministry-i Rs 45 crore agütsütsü.

Maneni, Ministry of Agriculture-i Rs 30 crore aser

Ministry of Food Processing Industries-i Rs 25 crore agütsütsü.

Iba mapatong nungsa APEDA, Ministries of Commerce aser MSME, ICAR, aser tanga agencies-i yariteper ta Scindia-i ashi.

Tripura nung central hub ka aser spoke centres 8 tashi lapoktsü aser hub ji Maharaja Bir Bikram Airport anasa amenoktsü ta paisa ashi.

Iba mapatong nungsa "waste-to-wealth" component dena lir aser jiru indang jana nungi bromelain extraction, jiru tou nungi fibre production aser GI-branded confectionery products yanglutsü ta DoNER Minister-isa ashi.

Assam & Meghalaya tsüngda arrtsü angatetteptsü: Himanta Sarma

Guwahati, May 29, 2026 (Agencies): Assam aser Meghalaya tsüngda arrtsü latettsü atema mapa inyaka aotsü mulungtepogo ta Assam Chief Minister Himanta Biswa Sarma-i ashi.

Hokolbarnü Lok Sewa Bhawan, Guwahati nung Meghalaya Chief Minister Conrad K. Sangma pelashishia agizükba sülen CM Sarma-i iba osang metetdaksü.

"Meghalaya Chief Minister aser ni meimba adianu Conrad Sangma tanü Lok Sewa Bhawan nung pelashishia agizükogo" ta pai ashi.


Künati onük aika olemtep aser state ana tsüngda mapang talangka mebeteti aruba tebilemtsü onüktem lemsatepogo ta Assam Chief Minister-isa ashi.

"Arrtsü ladangtsüba maparen tuluba inyaka aotsü aser teti atema lemtet ka

agitsü atema künati mulungtepogo" ta Sarma-isa metetdaksü.

Assam aser Meghalaya tsüngda "Ek Bharat, Shreshth Bharat" tangatetba nung wadang aika nung amalitepa inyaker. Northeast dang Prime Minister Narendra Modi-i "Ashtalakshmi region" ta ajar aser künati iba tesem renloka aotsü atema lenmangtem bushiteper ta CM Sarma-isa ashi.

Deckiajuli Estate indang süngojok seret nung Rs 800 agi ayok



Guwahati, May 29, 2026 (Agencies): Guwahati Tea Auction Centre (GTAC) nung Deckiajuli Tea Estate ajanga alizüng tongtipang ka tongtetogo aser ibaji BOPSM grade tea seret ka nung Rs 800 agi ayokba lir.

Deckiajuli Tea Estate ya Parry Agro Industries Ltd. meyong lir aser auction centre nung parnoki yangluba süngojok jenjang teimtiba agi yoktetogo. Deckiajuli Tea Estate indang süngojok packet 10 nung seret 260 ayok.

Deckiajuli Tea Estate ya Sonitpur district nung Brahmaputra tzüküm anasa lir aser parnoki black CTC teas tajung tsünüteter.

Iba premium lot ya J Thomas & Co. Pvt. Ltd. ajanga ayok aser Jain Tea Company ajanga alizük.

"Indian aser overseas markets nung quality Assam teas sapuba ajanga auction centre nung tea gardens ajanga jenjang tajung angur" ta Guwahati Tea Auction Buyers Association (GTABA) secretary Dinesh Bihani-i ashi.

Alima nung tea auction platforms tulutiba rongnung Guwahati Tea Auction Centre ya ka lir aser iba centre ya CTC teas atema kanga tajung lir aser tea producers, buyers, o exporters asoshi tongti shishilembadak ka ama lir.

US aser Iran nati ceasefire atsülangtsü 'tentative deal' ka mulungteper

Washington, Monupii/May 29 (Agencies): US aser Iran nungner yimjung ken o jembir temi ita asem rara nung ceasefire ano anogo 60 atsülanga Iran indang nuclear sentong indang jembishinü tasen tenzüksü asoshi 'tentative agreement' ka Brehostibarnü yangluogo, ta US ketdangsür kati ashi.

Iran-ibo tang tashi tezüngzüktep yangluba osang kecha memetetdaksü. Brehostibar nikongdang US Vice President JD Vance-ia 'tentative agreement' la lir ta jangjatsü saka Tir Donald Trump-i mulunga agizüksü asü masüar ano mejangja ta ashi.

"Tiri meyongnem agütsütsü asü magütsütsü mesüra kodang agütsütsüar ashitsü tasak," ta Vance-i osangbener dang ashi.

"Ojang kar nung atsütepa mapang lir," ta paisa ashi.

Iba rara nung US aser Iran tsüngta tashi mait ceasefire samaa aor ama akumba mapang ka nung iba memorandum of understanding ya temai adoker. Anogo ka tejangdang ang asendenshir tensa tamajungba kuma Iran nungi khaloktsüba missiles kar Kuwait-i anüglak nung lia soit, ta US Central Command

ajanga ashir. Iran-i Strait of Hormuz nung tolls memeshitetsü aser anogo 30 tsüngta iba tongtipang tzi lenmang nungi mines ajak Iran-i indoktsü memorandum nung tejangja shia lir, ta ketdangsür kati ashi.

Rara mapang Iran-i strait kanga junga shibangtet, koba ajanga alima nung totzü aser natural gas shilem 20 shi abener. Iba tesem shibangba ajanga alima ajunga nung totzü jenjang tali akum. Tezüngzüktep ka renemba sülen totzü jenjang kanga kera ajemtsü, ta US Treasury Secretary Scott Bessent-i Brehostibarnü osangbener dang shia liasü.

Iran-i tawa anogoshi shishilempaba rong 20 dak tema iba tesem ajangdaksür ta shia lir, koba rara metenzükdang anogo nung noklang dak tema ajanga iliasü, ajisüaka Islamic Republic-i rong kar dang tolls meshi.

Iba tentative agreement kübok US-i Iran nungner rongnendak tenokdangba agüja aliba agientsü aser sanctions salatsü aser Iran nungneri totzü timba ayoktsü melatsü.

Anogo 60 ceasefire mapang jembitsü onüktem rongnung Iran indang enriched uranium ya ka

lir. Islamic Republic ket nung purity shilem 60 tashi yanglur uranium seret 440.9 lir, ta International Atomic Energy Agency ajanga ashir. Iba uranium nung nok-nü nung amshitsü atema purity shilem 90 nüngdaker.

Iran-i yimjak nung uranium yangluba anentsü nangzüka mali. Iba oset ya nuclear sites asem nung rema lir südi ta amanger, koba US-i taoba küm tayimtsü amshia amakdang kanga sashia raksatsü.

Nuclear analysts temi ashiba agi, Iran-i par enriched uranium ya par tembang China mesüra Russia nem agütsütsü asoshi bilema alitsü akok. Saka Bodhbarnü Trump-i iba ama sentong nung pa sadoksayim masütsü ta shia liasü.

Iran-i par nuclear program ya raratsü atema masü ta jembia arur aser koba tezüngzüktep yangludir yangluaka Israel mitkari Lebanon nung Iran-i yariba Hezbollah telungpur anema raraba tembangtsüla ta ashir.

SÜR KÜM KA AJUNGER

TEYIMTSUNGLA (Mangmetong)



30-05-2025

Onoki na tanü aser teti bilemtetdang, onok mulungjang nung nü temeim aser shisatsü rizünga yua lir. Anogoshi miim nüktzü ayimer. Nü taochi aser temeim ola agi tanü aser teti onok nem anisüngzük agütsütsü, nü temeim aser sarasadem agi teti onok len anitsü.

Temeim chimur, Anük-apang & Semchirtem.

SANGDONGER

Ni Mr, Watitemjen Jamir S/O Mr. Lt. Wapangba Jamir aser Mrs Lt. Mayangla Japu Village Mokokchung Nagaland, aser kinungtsü Mrs Achila D/O Lt. Imtikumzukba Imchen aser Chubala Jamir Sungratsü village Mokokchung Nagaland. Onok telok Molung Ajemer Lingrijan Dimapur Indang sen künati ochi mashi-i telok sen aieka agiadok aser ibaji magütsütetba agi Alu Lumong Anepchang lushi nung aliba Fishery Ana (2) aser Tzülu ka (1) aser Metemra Lumong ta sentsü meyong iba telok nem bendanga agütsür.

Mr. Watitemjen Jamir

Mrs. Achila Imchen

Dated: 29-5-2026

Gaza Strip shilem 70 amokbangtsü IDF dang shiogo: Netanyahu

Tel Aviv, Monupii/May 29 (Agencies): Israel Ato Kilonser Benjamin Netanyahu-i Israel Defense Forces (IDF) dang Gaza shilem 70 tashi amokbangtsü totuyuba agütsüogo ta ashir.

Brehostibarnü sentong ka nung jembidang, "Tang asenoki Hamas dak alener; Strip indang territory shilem 60 asen kübok lir. Asenok shilem 50 nung liasü, ajisür shilem 60 akum. Ni totuyuba agütsüba ya," ta pai ashidang telok nungi nisung kati "100" ta ashi.

"Asenok mera ka-ka aotsü. Mezüngbuba nung 70. Asenoki yangji tenzükti. Asenoki tesem ajunga nungi parnok dak nungshir, tanüngba atema asenoki inyaktetsü."

Israel-i amokbangba ulushia aoba ya Donald Trump-i anir Israel aser Hamas tsüngta October 2025 nung ceasefire sangdongba nung aliba terms den mapeter.

Ceasefire liaka Israel-i Gaza nung maneni amakba mapang Netanyahu-i iba sangdong ya agütsü, aser Israel o Hamas na tetsüngtai US ia Trump indang peace plan tejakleni aotsü asoshi jembishinüba nung kati atsüanem makateti lir.

October ita ceasefire tenzüka sülen Palestine nungner 738 tepsetogo ta Hamas meyong health ministry ajanga ashir, koba UN-ia shidak ama züngshir.

IDF-i iba Strip shilem 60 dak tema aziüoka lir ta Netanyahu-i yimjak nung aiben shiogo, koba October ita shilem 53 asütsü mulungtepa liasü. Iba ceasefire agreement kübok IDF ya "yellow line" ta ajaba demarcation line alema ainshitsü shia lir.

20-point peace proposal nung ano mera agitsü aliba rongnung Hamas-i nok-nü yutsütsü aser Israel sepaitem ainshitsü dena lir, saka Israel aser Palestine nungner telungpur telok tsüngta kar ajanga jembishinüba nung terenlok maka anendaka lir.

Bodhbarnü Israel Defence Minister Israel Katz-i social media X nung, 2023 küm October 7 nü nisung aika tepsetba mapa anir inyaker ajunga samatsütsü ozü linüki nangzükgogo, ta zülua liasü.

"Hamas-i Gaza civilian mesüra mitkar madak yimsü mesüdaksütsü onoki nangzüka lir," ta pai ashi.

(Maneni tapak 8 nung...)



GOVERNMENT OF NAGALAND DIRECTORATE OF TECHNICAL EDUCATION

Nagaland : Kohima - 797004



NO.DTE/ESTT-2/3/2016-17/137

Dated, Kohima, the 29th May, 2026.

NOTIFICATION

This is to inform the interested candidates to collect a prescribed application form for Diploma Course given below outside the State during 2026-27 session from the directorate of Technical Education, Kohima (Below New Secretariat Complex) on payment of Rs.300/- (Rupees three hundred only) with effect from 30-05-2026 to 06-06-2026 during office working hours. The form may also be downloaded from the website <https://dte.nagaland.gov.in> in which case the fee should be submitted in cash along with form printed in white paper (A4 size) by hand.

The last date for receiving the complete forms by hand is 6th June, 2026 after which no request will be entertained. The Selection of candidate shall be purely on the basis of academic merit.

Sl.No	Name of Course	Seats	Eligibility	Institute
1.	Printing Technology	1	HSLC/Equivalent Passed Certificate with Minimum 40% in Mathematics and Science	Regional Institute of Printing Technology, Kolkata
2.	Photography	1	10+2 Passed (Science 45%) (40% in case of reserved category)	Dr Bhupen Hazarika Regional Government Film and Television Institute, Guwahati, Assam
3.	Audiography and Sound Engineering	1	10+2 Passed (Any Stream with 45%) (40% in case of reserved category)	
4.	Cinematography	1	10+2 Passed (Any Stream with 45%) (40% in case of reserved category)	
5.	Film and Video Editing	1	10+2 Passed (Any Stream with 45%) (40% in case of reserved category)	
6.	Applied Acting (Film & TV)	1	10+2 Passed (Any Stream with 45%) (40% in case of reserved category)	

Sd/-
(Er. VIPULHOU LHOUNGU)
Director

GOVERNMENT OF NAGALAND DIRECTORATE OF HEALTH & FAMILY WELFARE

NAGALAND: KOHIMA.

NO.DHFW-3/VACANCIES/DRV/DTE/19-20

Dated Kohima the May 2026

NOTIFICATION

In Pursuance of this Department advertisement No.DHFW-3/VACANCIES/DRV/DTE/19-20/774-80/ Dated Kohima the 12th June 2025 and vide Government approval letter No. H&FW (A)-12/90/2019/159, Kohima, dated the 25th May 2026 for recruitment of Drivers and basing on the marks obtained during the Driving Test/ Medical Test conducted on 29th July to 4th August 2025, the candidates bearing the following roll numbers are shortlisted for viva voice.

81	110	145	146	161	182	263	265	279	292
303	310	334	387	419	503	661	672	679	688
728	739	779	792	794	810	875	883	997	1049
1105									

Note:-

- All shortlisted candidates are directed to appear along with original documents for viva voice on 11.06.2026 from 10:00 am onward at IDSP Conference Hall, Directorate of Health & Family Welfare.
- No individual call letter shall be issued.

(DR. MERENINLA SENLEM)

Principal Director

Directorate of Health & Family Welfare

Nagaland : Kohima

ALI AYOKTSÜ LIR

Vihokhu village highway nungi minute 1 dang pilar

Rs 80 per sq. ft. (Any size)

Contact no. 8415081855

Lionel Messi-I FIFA World Cup trok buba nung asayatsü



Buenos Aires, Monupii/May 29 (Agencies): Bresthobarnü Argentina-i World Cup atema asayar 26 tenüing sangdongogo, kong Lionel Messi-i United States, Mexico aser Canada nung defending champions ama anir asayatsü.

Arishi küm 38 tain Inter Miami forward ya World Cup trok buba nung asayatsü, koba par linük nung otsü tasen ka asütsü, aser 2022 küm Qatar nung iba asayamung takok marok ajungketer tem nungi asayar 17 meyipa arurtem rongnung Emiliano Martinez, Nicolas Otamendi, Rodrigo De Paul, Alexis Mac Allister, Enzo Fernandez, Julian Alvarez aser Lautaro Martinez dena lir.

Coach Lionel Scaloni-i Argentina asoshi world title asem buba akokba nung tongti asayartem soit, ajüsüaka winger Angel Di Maria maden, shiba 2024 Copa America sülen international football nungi anisüingzüka lir.

Asayar tajung aika taküm Argentina squad nung mali, aser

item rongnung Aston Villa midfielder Emiliano Buendia aser Roma forward Paulo Dybala dena lir.

World Cup title defence metenzükdang Argentina ya United States nung June 6 nü Honduras den aser June 9 nü Iceland den warm-up asayatsü lir.

Midfielder Giovanni Lo Celso, shiba yiruba mechi 2022 World Cup nung masayateti liasü, pa 2018 küm Russia nung asayadang Argentina indang squad nung liaka masaya, pa iba asayamung anaben buba atema shimogo.

Argentina nung lanur asayar kar densema lir, shirnoki tarutsü nung anir asayatsü imlar, aser item rongnung Valentin Barco, Nicolas Paz aser Giuliano Simeone dena lir, aser forwards Jose Manuel Lopez aser Thiago Almada nungertem World Cup nung tang mezüngbuba asayatsü.

2022 küm iba asayamung akoker rongnung dena alisang lef back Marcos Acuna temang

majungba agi taküm iba asayamung nung shilem magitetsü, ta osangtem ajanga ashir.

2026 FIFA World Cup nung Argentina ya Group J nung lir, aser mezüng Algeria den Kansas City nung June 16 nü asayatsü aser iba sülen Jordan aser Austria den asayatsü.

Taküm World Cup nung Argentina squad yamai aitsü:

Goalkeepers: Emiliano Martinez (Aston Villa, ENG), Geronimo Rulli (Marseille, FRA), Juan Musso (Atletico Madrid, ESP)

Defenders: Gonzalo Montiel (River Plate, ARG), Nahuel Molina (Atletico Madrid, ESP), Lisandro Martinez (Manchester United, ENG), Nicolas Otamendi (Benfica, POR), Leonardo Balerdi (Olympique Marseille, FRA), Cristian Romero (Tottenham Hotspur, ENG), Facundo Medina (Marseille, FRA), Nicolas Tagliafico (Lyon, FRA)

Midfielders: Leandro Paredes (Boca Juniors, ARG), Rodrigo de Paul (Inter Miami, USA), Exequiel Palacios (Bayer Leverkusen, GER), Enzo Fernandez (Chelsea, ENG), Alexis MacAllister (Liverpool, ENG), Giovanni Lo Celso (Real Betis, ESP), Valentin Barco (Strasbourg)

Attackers: Lionel Messi (Inter Miami, USA), Nicolas Paz (Como, ITA), Thiago Almada (Atletico Madrid, ESP), Nicolas Gonzalez (Atletico Madrid, ESP), Julian Alvarez (Atletico Madrid, ESP), Lautaro Martinez (Inter Milan, ITA), Jose Manuel Lopez (Palmeiras, BRA).

Vinesh Phogat-i Asian Games trials nung shilem agitettsü

New Delhi, Monupii/May 29 (Agencies): Melangteper Vinseh Phogat-i Asian Games 2026 atema selection trials nung shilem agitsü Supreme Court-i temelaba agütsüogo.

Selection trials ya May 30 aser 31 nü agitsü lir aser federation ajanga mepishiba ken o ya Hokulbarnü Justices P S Narasimha aser Alok Aradhe nati angadanga liasü. "Tanü iba stafe nung high court-i totuyuba agüja teimla kadaktsü. La dangi kidangi oang aser onoki kecha meinyaktetsü ta ashitsü ya tim masütsü. Onoki tasü ita iba ya nüdang ashir," ta bench ajanga WFI asoshi nokdakba counsel dang ashir.

Linük nung tematiba court-i taruba hopta jembitsü lemetet.

Delhi High Court ajanga totuyuba agütsüba ya tim masü ta Wrestling Federation of India (WFI) ajanga Supreme Court dangi aben. High Court-i Vinesh Phogat ya trials nung shilem agitsü temelaba agüja liasü.

Delhi High Court-i wrestler Vinesh Phogat ya selection trials nung toktepdaktsütsü telemtetba agia la maternity leave nungi meyipa shilanga dak sendakba nung ken o atsütepba tali akum.

Mepetmesü ya May 22 nü Delhi High Court totuyuba nungi adok, kong division bench ajanga Phogat ya May 30 aser 31 nü Asian games trials nung shilem agitsü mela liasü. Court-i WFI indang selection policy

nungya tangar dak alakteta saisaponger maternity break nungi meyipa shilanger atema mali aser criteria ya 'exclusionary' ka lir ta ashi.

High Court-i trials ya video tangoktsüla aser Sports Authority of India (SAI) aser Indian Olympic Association (IOA) nungi independent observers tem arua reprangtsüla ta totuyuba agütsü.

Phogat-i WFI indang eligibility norms ya meshidak ta ken o benoka qualification window ya la mashisa aliba, tanur sor temang taneptsü anguba mapang lir, anungji la tokteptsü maongka shibangtsü ta ashi.

Ita tetenzüklen federation-i la June 26 tashi domestic events nung tokteptsü metemsü, kechiaser anti-doping ozüing ya saisaponger anisüingzüka nungi meyipa shilanger dak amshitetsü ta ashi. Ajüsüaka Phogat-i Gonda nung National Open Ranking Tournament nung shilem agia liasü.

Taoba WFI tanishir Brij Bhushan Sharan Singh anema 2023 küm melangteper temi longkak aitba rongnung taoba world championship nung medal ngua alila Phogat ya ka liasü.

2024 August ita tesasatsüka Paris nung Olympic final mapanga anepdang temang tuozük tendangba mapang grams 100 agi tali liasü aser disqualify sütsü.

Singapore Open 2026: PV Sindhu tsükogo

Singapore, Monupii/May 29 (Agencies): India tsür badminton asayar PV Sindhu-i World No. 1 An Se Young ano mokokteti Hokulbarnü Singapore Open Super 750 badminton tournament quarterfinals nungi tsükogo.

Olympic nung anaben medal ngua alila Sindhu-i la dak asayatsü sempet tajung aliba sayua mapang shia Korea tsürla kanga anibelemdaktsü, saka straight-game nung tsük.

An dak control, movement aser tashi tajungba aliba ajanga nüngdakba mapang tajangzük ngua Sindhu madak 21-17, 21-14 agi takok ngua liasü.

Ibai tang Olympic champion-i asaya toku nung tanen makai Sindhu madak takok anguba alitsü. Tena tokuben asayaba nung India tsürlai 2023 Badminton Asia Championships mapang game ka kisüing agiteta liasü.

Sindhu asoshi mapa tasak liasü, kechiaser An ya taküm asaya ka kisüing nung tamakok ajurua lir aser 2025 küm tepiyong nung tamakok pezüben kisüing

ajurua liasü. Mezüing set nung Sindhu ya 7-11 agi tajemba liasü, saka lai kanga meranga asaya 13-14 akum.

Lai kanga yakyaka asaya, saka An-i net anasa kanga junga asayatetba yong lai maongka timba agitet. Ajüsü Sindhu ya 16-18 atong aser 17-19 ajung.

Ajüsüaka mapang meshidak nung wide shot asüba yong An nem game points asem agütsü aser Korea tsürlai akok.

Tanabuba set ya Sindhu asoshi mejungi tenzüka An ya 6-0 agi temaba nung liasü. Sindhu-i tanem-tanemi ayamesoa 6-8 ajung. An-i kanga kera 11-7 agi timba akum aser khen anisüingzüka sülen Sindhu-i kanga junga langzüteta 11-14 ajung aser 30-shot rally ka sülen 12-14 akum.

Saka nüngdakba mapang lai ishíben aibelenba yong la atsüdaka ayu aser 13-18 agi An temaba jenjang nung liasü.

Korea tsürlai court nung la kanga anibelemdaktsü aser minute 48 buba nung semifinals asayatsü maongka agia liasü.

BENDANGLI OSANG :

Tapak 7 nungi...

Gaza Strip shilem 70 amokbangtsü IDF...

Gaza nungi 'voluntary emigration' atema sentong ya mapang tetemsü nung tim yimya amshia inyaktsü, ta pai ashi.

Israel indang far-right National Security Minister Itamar Ben Gvir aser far-right Finance Minister Bezalel Smotrich nati taoba mapang yimjak nung Gaza nungi Palestine nung "voluntary migration" bhukuma liasü - koba ajanga civilian tem tashiyim agi tesem balala nung prokshidaktsütsü, koba war crime ka lir aser Jews nung den tanaben külemi alitsü.

Tan hopta Gaza nung ishíben amakba nguogo. Bodhbar aonung Gaza City nung Israel-i ki ka amakba mapang tanur pongu densema nisung ter tepset, ta yangji aliba

mozüki tem ajanga ashir. Israel mitkari sangdong tatsüka agütsüba nung parnoki Gaza Strip north tsütsü central Hamas terrorists ana amak ta ashi saka parnok tenüing tejangja magütsü.

Iba ya Hamas battalion commander Imad Asleem dak tenük yoker amakba amai lir, kong pa den par jala Israa tepset.

Aji masüdang Hamas military wing nung tasen shima aliba tekolakba Mohammed Odeh den pa kinungtsü aser jabaso ana Israel-i amakdang tepseter liasü. Iba mapang ano tetsür ka tepset ta ashir.

Israel mitkarisa ano Mongulbarnü Khan Younis nung gari ka amakdang Ihab Khazim tepset ta ashir, shiba Hamas funds transfer network

tekolakba liasü aser Hamas production headquarters nung unit ka tanishir Mohammed al-Habash tepset, shiba nok-nü yangluba nung dena liasü ta ashir.

2023 küm Hamas-i anir amakdang nisung 1,200 shi tepseter nisung 251 pua bener oa Gaza rara tenzük.

Israel-i telangzüba agüja Gaza nung military campaign tesashi ka tenzük, koba ajanga Palestine nung litsü tuluba aoyi kumtsü aser yangji alir nisung 2.1 million pei ki yutsür tesem balala nung jenshi.

May 12, 2026 tashinung Palestine nung 72,742 Gaza nung tepsetogo aser 172,565 yirur lir, ta Hamas meyong health ministry ajanga ashir. Tepseter tem rongnung tanur 21,283 lir.

BILEMDANGANG

"Nai komaka ajema jembir, yamaji nai tali angazüker."